

ՀԱՅԱՍՏԱՆՈՒՄ  
ՖԵՈՂԱԼԱԿԱՆ ՀՈՂԱՅԻՆ ՍԵՓԱԿԱՆՈՒԹՅԱՆ ԾԱԳՄԱՆ  
ԵՎ ՀԱՍՏԱՏՄԱՆ ՀԱՐՑԻ ՇՈՒՐՁԸ

Ա. Մ. ԴԱՆԻԵԼՅԱՆ

1. Ֆեոդալական հասարակության տնտեսական հիմքը հողային սեփականությունն է. դրանով են պայմանավորված այդ հասարակության արտադրական, փոխանակային և բաշխման հարաբերությունները, որոնք միասին վերցրած կազմում են ֆեոդալիզմի տնտեսական կառուցվածքը, այն իրական հիմքը, որի վրա հիմնվելով բարձրանում են պետական և իրավական ձևերը՝ Ուրեմն, Հայաստանում ֆեոդալական հասարակարգի ծագման ու զարգացման ընթացքը հասկանալու համար նախ անհրաժեշտ է քննության ենթարկել ֆեոդալական հողային սեփականության ծագման հարցը՝ երբ և ինչպես է այն ծագել, զարգացման ինչ փուլեր է նա անցել, Իրա հետ միասին պետք է նշվի, որ հին Հայաստանը իբրև տնտեսական, քաղաքական ու կուլտուրական զարգացմամբ սերտորեն կապված է ևղել հարևան երկրների՝ Իրանի, Բյուզանդիայի, Վրաստանի և Աղվանքի հետ և ընթացել է զարգացման նույն ճանապարհով։ Այդ նշանակում է, որ Հայաստանում ֆեոդալական հողային սեփականության ծագման և հաստատման հարցի լուսաբանումը կարող է կարևոր նշանակություն ունենալ նաև վերոհիշյալ երկրների պատմությունը հասկանալու համար, հատկապես եթե նկատի ունենանք այն, որ մեր աղբյուրները ֆեոդալիզմի ծագման ու զարգացման մասին պարունակում են համեմատաբար կարևոր տվյալներ։

Ստորև կփորձենք ի մի բերել մեր աղբյուրներում եղած տվյալները և որոշել ֆեոդալական հողային սեփականության ծագման և հաստատման հիմնական հարցերը։ Հոգիվածում բերված փաստական տվյալները բազմիցս քննարկվել են Հայաստանի պատմությանը վերաբերող գրականության մեջ։ Փորձ է արվում այդ տվյալներին տալ նոր լուսաբանում և, որ զխափորն է, բացահայտել դրանց ներքին կապը, դրանք դիտել պատմական զարգացման պրոցեսում։

2. Ֆեոդալիզմը Հայաստանում հարցի մասին կա բավականին գրականություն։ Նշանակալից են առանձնապես Ն. Ադոնցի, Հ. Մանանդյանի, Խ. Սամվելյանի և ուրիշների ուսումնասիրությունները։ Տվյալ հարցը լայն քննության առարկա դարձավ հատկապես Խաչատրյանի տարիներին։ Ս. Երևմյանը, Ա. Լ. Բերահամյանը, Բ. Առաքելյանը և ուրիշ հայ պատմաբաններ, ելնելով ժամանակակից պատմական գիտության պահանջներից և վերագնահատելով կուտակված հարուստ նյութը, որոշակի արդյունքների հասան ֆեոդալիզմի ծագման պրոբլեմի դիտական լուսաբանման ասպարեզում։ Ներկայումս ըն-

1 Հայաստանի ֆեոդալիզմի պատմության վերաբերյալ գրականության մանրագնին քննությունը տես Լ. Բաբայան, Հայաստանի ֆեոդալիզմի զարաշրջանի պատմության ուսումնասիրությունը սովետահայ պատմագրության մեջ, Երևան, 1970, էջ 27—88։

դուելված է այն կարծիքը, որի համաձայն մեր թվականության III դարում Հայաստանում սկսվեց ստրկատիրական հարաբերությունների ձգնաժամը, իսկ IV դարում ձևավորվեցին ֆեոդալական հարաբերությունները: Ըստ այդ տեսակետի IV դարում Հայաստանում արդեն գոյություն ունեին ֆեոդալական հողատիրության հիմնական ձևերը՝ «հայրենիք» (ալլոդ), «պարգևանք» (բենեֆիցիում) և «խոստակ» (լեն, ֆեոդ<sup>2</sup>):

Գոյություն ունի մի այլ տեսակետ, ըստ որի՝ «Ֆեոդալական կացութաձև: ստրկատիրական հասարակության ընդերքում գոյություն ունեւ շատ վաղուց. սակայն դա նոր որակ ստացավ, արտադրության հիմնական եղանակ դարձավ միայն մեր թվականության III դարում»:

Մենք մտադիր չենք այստեղ կանգ առնել մեջբերված տեսակետների վրա. քննել այն փաստարկումները, որոնք առաջ են քաշում այդ տեսակետների կողմնակիցները: Անվիճելի է միայն այն, որ մեր թվականության III—IV դարերում Հայաստանում, ինչպես և հին աշխարհի բոլոր երկրներում, ստրկատիրական հասարակությունն ապրում էր սուր ձգնաժամ և այդ մեռնող հասարակության ընդերքում արդեն ծագում ու զարգանում էին գալիք ֆեոդալական հասարակության սաղմերը: Սակայն դրա հետ միասին ոչ մի դեպքում չպետք է մոռանալ, որ անցումը ստրկատիրական հասարակությունից ֆեոդալիզմին՝ իսկ սոցիալական հեղաշրջում էր: Ծիշտ է, այն տեղի ունեցավ խաղաղ ճանապարհով և տեեց շուրջ երեք դար, բայց դա սոցիալական հեղաշրջում էր, որի ընթացքում հանուն ֆեոդալական սեփականության ղոհաբերվեց ստրկատիրական մասնավոր սեփականությունը: «Բոլոր մինչալժմյան ռեոլյուցիաները, — գրում է էնգելսը, — ռեոլյուցիաներ էին սեփականության մի տեսակը սեփականության մյուս տեսակի դեմ պաշտպանելու համար: Նրանք չեն կարող սեփականության մի տեսակը պաշտպանել, առանց խախտելու մյուսը»:

Մեզ թվում է, որ հին Հայաստանի պատմությունը վերաբերող գրականության մեջ անհրաժեշտ չափով ուշադրություն չի դարձվել այդ հանգամանքի վրա: Աղբյուրների ուշադիր քննությունը ցույց է տալիս, որ Տրդատ III-ի և նրա հաջորդների օրոք Հայաստանում իրականացվել են մի շարք պետական, վարչական, եկեղեցական և հողային ռեֆորմներ, որոնք մինչև հիմա (բացի եկեղեցական ռեֆորմից) գիտական ուսումնասիրության չեն ենթարկվել: Իսկ առանց դրա անհնարին է խորամուխ լինել ֆեոդալական հարաբերությունների ծագման ու զարգացման հարցի մեջ և տալ այդ պրոցեսի գիտական վերլուծությունը:

3. Ինչպես հայտնի է, ֆեոդալական արտադրանական առաջացման նյութական հիմքը խոշոր հողատիրությունն է: Անվիճելի է նաև այն, որ III—IV դարերում հին Հայաստանում գերիշխում էր խոշոր հողատիրությունը: Պարզության համար համառոտակի կանգ առնենք եկեղեցական խոշոր հողատիրության առաջացման վրա:

<sup>2</sup> Տե՛ս «Հայ ժողովրդի պատմություն», առաջին մաս, Երևան, 1951, էջ 76—77, 78: Տե՛ս նաև «История СССР», т. 1, под. ред. М. В. Нечкиной, М., 1956, էջ 44: «Очерки истории СССР, III—IX вв.», М., 1958, стр. 174.

<sup>3</sup> Տե՛ս «Հայ ժողովրդի պատմություն», հատ. 1, Երևան, 1963, էջ 269:

<sup>4</sup> Յ. էնգելս, Ընտանիքի, մասնավոր սեփականության և պետության ծագումը, Երևան, 1965, էջ 156:



Ինչպես երևում է աղբյուրներից, III դարում հեթանոսական տաճարներն ունեին խոշոր ստրկատիրական տնտեսություններ՝ ավաններ, դաստակերտներ՝ իրենց ագարակներով: Քրիստոնեությունը պետական կրոն ճանաչելուց հետո (301) Տրդատ III-ը այդ տնտեսությունները բռնագրավեց ու նվիրեց եկեղեցուն: «Եւ զդաստակերտսն (Անահիտի) և զսպասավորսն քրմօք հանդերձ և նոցին գետնովքն և սահմանօքն ի ծառայութիւն նուիրեցին եկեղեցոյ սպասավորութեան»<sup>5</sup>: «Եւ զգեօղն (Թորդան) ամենայն դաստակերտօքն հանդերձ և սահմանօքն լանուն եկեղեցոյն նուիրէին...»<sup>6</sup>: «...և դաւանն ամրականաւ հանդերձ ի ծառայութիւն եկեղեցոյն նուիրէին»<sup>7</sup>: «Եւ քանդէին զնանէական մեհնանն դստերն Արամազդայ ի Թիլ յաւանի: Եւ զգանձս երկոցուն մեհնանցն աւարեալ ժողովեալ՝ ի նուէր սպասուց սուրբ եկեղեցոյն աստուծոյ թողուի: տեղեօքն հանդերձ»<sup>8</sup> և այլն:

Հովհան Մամիկոնյանի վկայությամբ Անահիտի տաճարը ունեցել է 12 լայնարձակ դաստակերտներ՝ «աւանագեղք», որտեղ բնակվում էին բազմահազար երգեր: Տրդատ թագավորը այդ բոլորը բռնագրավում և նվիրում է եկեղեցուն<sup>9</sup>: Բացի դրանից, թագավորի կարգադրությամբ երկրի բոլոր բնակավայրերում՝ ավաններում և ագարակներում, եկեղեցու օգտին առանձնացնում են հողակտորներ<sup>10</sup>:

Այսպես ծագեց եկեղեցական խոշոր հողատիրությունը: Բայց դա միայն սկիզբն էր: Հայկական եկեղեցու ոսկեդարը սկսվում է Տրդատից հետո, երբ հոգևորականները հարստություն կուտակելու նպատակով դիմում են ամենատարբեր միջոցների: Ամենասիրված և սովորական միջոցը, որին հաճախակի նրանք դիմում էին, դա եկեղեցու օգտին կատարվող նվիրատվությունների քաջալերումն էր: Դրան նպաստում էր ժողովրդի մեջ տարածված հավատը, ըստ որի եթե մարդ այս աշխարհում եկեղեցուն զոհաբերի որևէ բան, ապա այն աշխարհում հատուցում կստանա: Սահակ Պարթևի 51-րդ կանոնում գրված է. «Իշխանք զգեալս և զդաստակերտս և գանձս ոսկոյ և արծաթոյ, այնք յանդաստանաց և ի պատճարաց և ի հանդերձից պատուականաց, ոմանք վասն անձանց վրկութեան, կէսք յաղագս սիրելեաց և ծնաւդաց և զվախճանելոց հատուցանել հատուցմունս...»<sup>11</sup>: Կանոնը պահանջում է պահպանել աստվածային պատվիրանները. «Գանձեցեք ձեզ գանձս յերկինս, ուր ոչ ցեց և ուտիճ սպականեն, և ոչ գողք ական հատանէն և գողանան, և թէ դատարկածեոս ամենեին մի երեւեցիս առաջի իմ»<sup>12</sup>:

Սակայն հոգևորականների համար այդ բոլորը քիչ էր: Հարստություն շորթելու նպատակով նրանք դիմում էին իւրաքախություն, խաբէրայության և այլ միջոցների: Փաւստոսը իր «Պատմութիւն հայոց» գրքում նկարագրում է ոմն Եպիսկոպոս Հոհաննի, որը խեղկատակություններով հայ թագավորներից շոր-

5 «Աղաթնագեղայ Պատմութիւն հայոց», Թիֆլիս, 1914, էջ 397:

6 Նույն տեղում, էջ 398:

7 Նույն տեղում, էջ 399:

8 Նույն տեղում, էջ 400:

9 Հ. Մամիկոնյան, Պատմութիւն Տարօնոյ, Երևան, 1941, էջ 111—112:

10 Աղաթնագեղոս, էջ 423:

11 Տե՛ս «Կանոնագիրք Հայոց», Ա, աշխատությամբ Վազգեն Հակոբյանի, Երևան, 1964, էջ 412:

12 Նույն տեղում, էջ 413:

թում էր գյուղեր և աղարուկներ: «Եւ էր սա այր կեղծաւոր, և երեքուցանէր իւրն զանձն իւր մարդկան պահող և խորգահանդերծս... և յագահութեան առանց շահոյ էր հեղեալ...»<sup>13</sup> «...յորժամ երթայր առ թագաւորն հայոց, խաղկատակ լինէր նոցա... ի ղորք անկեալ յոտս և ի ձեռս սողէր առաջի թագաւորացն, և ղուղտու ղծայն ածէր կառաչելով... ասելով թէ ուղտ եմ, ուղտ եմ, և վարքայի զմեղս բառնամ, ղիք ի վերայ իմ ղմեղս արքայի, թող բառնամ: Իսկ թագաւորն զմորհակս գիւղոց կամ ղագարակաց դրեալ և կնքեալ ղնէին ի վերայ ողինն Յոհաննու փոխանակ ընդ մեղաց իւրեանց»<sup>14</sup>:

Այսպիսով, Տրդատ III-ի կրոնական ռեֆորմի հետեանքով աշխարհիկ խոշոր հողատիրության կողքին երևան եկավ եկեղեցական խոշոր հողատիրությունը: Բավական է նշել, որ, Փավստոսի ասելով, ներսես կաթողիկոսը ունեւ 15 գավառ «իբրև սեփական ի բնմէ»<sup>15</sup>:

4. Աղբյուրների տվյալների վերլուծությունը ցույց է տալիս, որ III—IV դարերում Հայաստանի հողային հարստության մեծ մասը գտնվում էր աշխարհիկ և եկեղեցական խոշոր հողատերերի, իսկ նվաղագույն մասը՝ մանր հողատերերի, շինականների ձեռքում: Բայց թե՛ մեկը, և թե՛ մյուսը սեփականատերեր էին: Հենց այն հանգամանքը, որ հողատերերը այս կամ այն առիթով եկեղեցուն նվիրում էին կալվածներ, գյուղեր, ագարակներ և այլն, ցույց է տալիս, որ հողը եղել է նրանց տերերի սեփականությունը: Բերենք մի քանի այլ փաստեր:

Հովհան Մամիկոնյանը վկայում է, որ Կուռու ու Պարեխ դաստակերտները, որոնք Տրդատ թագավորը նվիրեց եկեղեցուն, հետագայում «իշխան ոմն անաւրէն կտեաց զերկոսեանս և ետ գուսանի մի»: Պատմիչի վկայությամբ Արծրունյաց իշխանը «կշռեաց 22000 դահեկան և տարաւ ետ, նոյն իշխանին և գնեաց զերկոսեան և ետ (սուրբ) Կարապետին վճւով»<sup>16</sup>, Բացի դրանից, Արծրունյաց իշխանը Ս. Կարապետին նվիրում է «երկու աւանս իւր իշխանութիւն է»<sup>17</sup>:

Ուշագործյան արժանի է Ղաղար Փարպեցու վկայությունը: Նա պատմում է, որ Սահակ կաթողիկոսը շատ էր վշտանում «վասն զի ոչ գոյր իւր արու որդի, բայց միայն դուստր մի, ղոր էր տուեալ կնութեան Համաղասպայ տեառն: Լճամիկոնէից և Հայոց սպարապետի, որ ծնաւ ի Համաղասպայ երիս արու որդիս... որոնց ետ և կնքեաց... փողից իւրեանց և ագարակից և որ ինչ միանդամ էր իւր և ետ նոցա ի ժառանգութիւն»<sup>18</sup>:

Այդ կարգի փաստեր կարելի է գտնել նորենացու, Եղիշեի և մյուս պատմիչների մոտ, նաև կանոնական որոշումների մեջ: Նորենացին գրում է, որ «այժմ ղիւղից և գաւառաց ևս և իւրաքանչիւր տանց առանձնականութեանց, և հանուրց հակառակութեանց և դաշանց այժմ առ մեղ գտանին անբաւ ղրուցայ մատեանք, մանաւանդ որ ի սեփական աղատութեան պայաղատութիւն»<sup>19</sup>:

13 «Փաւստոսի Բուղանդուցոյ Պատմութիւն հայոց», ՍՊԲ, 1883, էջ 225:

14 Նույն տեղում, էջ 228:

15 Նույն տեղում, էջ 97:

16 Հ. Մամիկոնեան, էջ 156—157:

17 Նույն տեղում, էջ 157:

18 Ղաղար Փարպեցի, Պատմութիւն հայոց, 1907, էջ 76:

19 «Լճամիկոնէի նորենացոյ Պատմութիւն հայոց», Թիֆլիս, 1913, էջ 13:



Այդ փաստերը պարզորոշ կերպով ցույց են տալիս, որ հին Հայաստանում պոյություն է ունեցել հողի մասնավոր սեփականությունը։ Հողատերը (խոշոր թե՛ մանր) իրավունք ուներ իր կալվածք, գյուղը, ավանը, ագարակը և այլն, վաճառել, նվիրել, կտակել, գրավ դնել, այսինքն՝ նա ուներ հողին տիրապետելու, այն օգտագործելու և տնօրինելու իրավունքները։ Խոշոր հողատիրության առկայությունը անհրաժեշտաբար ենթադրում է, որ մինչ այդ հին Հայաստանում գոյություն է ունեցել հողի մասնավոր սեփականությունը։ Չէ որ խոշոր հողատիրությունը հանկարծակի չի առաջանում, այն կարող էր առաջ գալ ու ծավալվել ի հաշիվ մանր հողատերերի, նրանց քայքայման ու հողագրկման։ Այնտեղ, որտեղ դեռևս չկա հողի մասնավոր սեփականություն, հողը դեռ չի դարձել առուծախի առարկա — այնտեղ խոշոր հողատիրության առաջացումը անհնարին է։ Այն օրվանից, երբ ծագեց հողի մասնավոր սեփականությունը, երբ հողը դարձավ առուծախի առարկա, խոշոր հողատիրության առաջացումը միայն ժամանակի հարց էր<sup>20</sup>։

5. Այսպես ուրեմն, բերված նյութերը համոզիչ կերպով ցույց են տալիս, որ III—IV դարերում Հայաստանի տնտեսության մեջ գերիշխում էր խոշոր հողատիրությունը։ Երկրի հողային հարստության զգալի մասը կենտրոնացած էր աշխարհիկ և եկեղեցական խոշոր հողատերերի ձեռքում, մի հանգամանք, որ Արշակունիների համար պետք է բացասական հետևանքների ունենար։ Արդարև, խոշոր հողատիրությունը, առաջ գալով ի հաշիվ մանր հողատիրության, զգալի հարված հասցրեց Արշակունիների ֆինանսական դրությանը՝ պակասեց շինականներից գանձվող հարկերի քանակը այն ժամանակ, երբ պետության արտաքին ու ներքին պայմանների բարդացման հետևանքով անընդհատ աճում էին նրա ծախսերը։

Մյուս կողմից, խոշոր հողատիրության ծավալումը թուլացրեց Արշակունիների թագավորության ներքին միասնությունը, ուժեղացրեց պետության ապակենտրոնացման հակումները, որոնք զրսևորվում էին Արշակունիների դեմ կազմակերպված խռովությունների, ապստամբությունների և դավադրությունների ձևով։

Երկրի ներքին հակասությունների սրման հետ մեկտեղ, վատացավ նրա արտաքին դրությունը։ Սասանյանների բարձրացումը Պարսկաստանում և բյուզանդական կայսրության հիմնումը Բոսփորի ավին շատ լուրջ կերպով բարդացրեցին Արշակունիների արտաքին բաղադրական վիճակը, որը ավելի սրեց պետության ներքին հակասությունները։

Այդ պայմաններում Արշակունիները, քնական է, պետք է որ միջոցներ ձևնարկեին պետության միասնականությունը վերականգնելու և ամրապնդելու ուղղությամբ։ Այդ միջոցառումներից առաջինը եղավ քրիստոնեության ընդունումը, որ տեղի ունեցավ IV դ. սկզբին Տրդատ III-ի օրոք։ Քրիստոնեական կրոնի միջոցով Արշակունիները ցանկանում էին ամրապնդել պետության խաթալված հիմքերը և ապահովել նրա միասնականությունը, միաժամանակ կրոնով սահմանադատվել Սասանյաններից, որոնք ձգտում էին նվաճել Հայաստանը։

<sup>20</sup> Տե՛ս К. Маркс и Ф. Энгельс, Сочинения, т. 19, էջ 497։

Բացի կրոնական ունեւորներից, Արշակունիները կարևոր բարեփոխություններ կատարեցին պետական օրգանների և ռազմական ուժերի կատարելագործման ուղղությամբ:

Սակայն ինչպես երևում է աղբյուրների տվյալներից, վերոհիշյալ բարեփոխությունները Արշակունիներին չտվին սպասելիք արդյունքները: Ընդհանրապես, պետության դեմ կազմակերպվող խռովությունները ավելի հաճախակի էին դառնում, դրանք հրահրվում ու հովանավորվում էին Բյուզանդիայի և Պարսկաստանի կողմից: Արշակունիները դաժանորեն ճնշում էին աշխարհատերերի և զավառատերերի կողմից կազմակերպված խռովությունները, իսկ ըմբոստների կալվածները բռնագրավում էին արքունիքի օգտին: Այդպես վարվեց խոսրով III-ը (330—338)՝ Մանավադյան և Որդունի, Դատաբեյ ու Բակուռ իշխանների հետ: Պետության դեմ կազմակերպված ելույթները ավելի լայն չափերի հասան Արշակ II-ի ժամանակ (345—367): Բազմաթիվ նախարարական տոհմեր ենթարկվեցին խիստ պատժի, իսկ նրանց ունեցվածքը բռնագրավվեց արքունիքի օգտին: Սակայն Արշակ II-ին չհաջողվեց հնազանդեցնել խռովարարներին ու միավորել էրկրի ուժերը: Նա ինքն զոհ դարձավ նախարարների կողմից կազմակերպված դավադրությանը: Պապ թագավորը (369), որ բյուզանդական զորքի օգնությամբ վերականգնեց Արշակունիների զահր, ամենայն դաժանությամբ ճնշեց խռովությունները: Նրա կողմից կազմակերպված պատժիչ ջոկատները Մուշեղ Մամիկոնյանի զինավորությամբ քնաջինջ արին բազմաթիվ նախարարական տոհմեր, իսկ կալվածները բռնագրավեցին արքունիքի օգտին<sup>21</sup>:

Պապ թագավորը խոշոր միջոցառումներ իրականացրեց հայկական եկեղեցու նկատմամբ: Նա բռնագրավեց եկեղեցական հողերի զգալի մասը, վերացրեց անապատները, անկեղևոցները, հյուրանոցները և այլ եկեղեցական հիմնարկությունները, որոնք կառուցվել էին ներսես կաթողիկոսի օրոք, իսկ աշխատունակ ժողովրդին հրամայեց վերադառնալ իրենց տեղերը և վճարել պետական հարկերը: Ծինականների հարկունակությունը բարձրացնելու նպատակով Պապը վերացրեց եկեղեցու օգտին ժողովրդից գանձվող տասանորդը:

Բացի դրանից, Պապ թագավորը վերացրեց բյուզանդական եկեղեցու ազդեցությունը հայկական եկեղեցու վրա: Նա վերացրեց այն սովորությունը, որի համաձայն հայոց կաթողիկոսը ձեռնադրվում էր Կեսարիայում: Այնուհետև կաթողիկոսը պետք է ձեռնադրվեր Հայաստանում և հաստատվեր թագավորի կողմից: Այսպիսով, հայկական եկեղեցին ընդմիջտ կտրվեց հռոմեական եկեղեցուց ու դարձավ ինքնուրույն: Դա Պապ թագավորի կարևորագույն բարեփոխություններից մեկն էր:

6. Պապ թագավորի կողմից իրականացված ռեֆորմների մեջ կարևորագույնը պետք է համարել այն արժատական փոփոխությունը, որ նա անցկացրեց հողատիրության ձևի բնագավառում:

Պատմական այն անցքերը, որոնք տեղի ունեցան Հայաստանում Տրդատ III-ի, խոսրով III-ի, Տիրանի և Արշակ II-ի ժամանակաշրջանում, պետք է Պապին և նրան մոտիկ կանգնած մարդկանց համոզեին, որ նախարարների խռովությունների ճնշումը ու նրանց ունեցվածքի բռնագրավումը ցանկալի արդյունքներ չեն տալիս: Ինչ վերաբերում է բռնագրավված կալվածներին, ա-

<sup>21</sup> Տե՛ս Փ ա վ ս տ ո ս, էջ 175—179:



պա դրանք, որպես կանոն, նորից վերստի դրվում էին պատվազուրկ արված նախարարների որդիներին: Ուրեմն անհրաժեշտ էր դտնել առավել ազդու միջոց նախարարներին արքունիքին ավելի սերտ կապելու համար: Եվ որովհետև նախարարների հզորությունը հիմնված էր խոշոր հողային սեփականության վրա, ապա այդ նպատակին հասնելու համար պետք է փոխվեր գոյություն ունեցող հողատիրության ձևը:

Այսպես, ուրեմն, ինչու էր կայանում այդ փոփոխությունը և ինչ նոր հարաբերություններ առաջ եկան դրա հետևանքով:

Պապ թագավորի հողային ռեֆորմի մանրամասնությունները մեզ, իհարկե, հայտնի չեն: Բայց հորենացու վկայությունից պարզվում է հետևյալը. հետագա խռովությունները կանխելու և խռովարարներին արքունիքի հետ կապելու նպատակով բռնագրաված կալվածները այլևս չեն վերադարձվում նրանց ժառանգներին որպես հայրական սեփականություն, այլ շնորհում են նրանց արքունիքին մատուցած ծառայությունների համար որպես պարգևական, որոշակի պայմանով, որի խախտման դեպքում, արքունիքը կալվածը հստ էր վերցնում: Այսպիսով, խոշոր ու միջին հողատերերը ընդմիջտ կորցնում են իրենց սեփական կալվածները և դառնում են արքունի հողերի ձեռնավորները (держатели):

Մյուս կողմից, որպեսզի ապահովվի տվյալ գավառում բնակվող շինականներից ու քաղաքացիներից հարկերի հավաքումը և նրանց կողմից պետական պարտականությունների կատարումը, պարզեցություններին (պարզեցական ստացողներին) արքունիքը տալիս է պետական իշխանության ֆունկցիաներ: Դրան համապատասխան պարզեցական ստացողը տվյալ գավառի բնակիչների նկատմամբ հանդես է գալիս որպես տ եր (Արծրունյաց տեր, Մոկաց տեր, Մամիկոնեից տեր, Ամատունի տեր և այլն):

Եվ վերջապես, արքունիքը պարզեցականի վրա պարտականություն է դնում, որպեսզի նա իրեն ենթակա գավառում ապրող բնակիչներից ղինվորական ծառայության համար հավաքարի սահմանված թվով մարդիկ ու առաջնորդի նրանց ռազմական արշավանքի ժամանակ: Զինվորական առաջնորդի դերում պարզեցական ստացողը հանդես էր գալիս որպես ի շ ի ս ա ն (իշխան Ամատունի, իշխան Կամսարական, իշխան Ռշտունի և այլն):

Ստորև մենք կանգ կառնենք միայն պարզեցականի վրա:

Խորենացին պատմում է, որ երբ պատերազմները վերջացան, ներքին խռովությունները ձնշվեցին և երկիրը խաղաղվեց, «արքայն Պապ դարձոյց ի Կամսարականն Սպանդարատ դամենայն ինչ՝ զոր յափշտակեալ էր հօր իւրոյ Արշակայ, զգաւառն Շիրակայ և զԱրշարունեաց, ոչ իրեւ զանիւրաւ զագահութիւնն հօր իւրոյ Արշակայ, այլ որպես պարզես ընդ վաստակոց քաջին Սպանդարատայ, որ սպան զՂեկաց արքայ: Այլ և զայլոց նախաբարացն դարձոյց զզրկանս և յոյժ անընչասիրաբար ցուցանէր զիւր ախորժակն և առատաբար կայր»<sup>22</sup>:

Խորենացու այս վկայության մեջ արձանագրված է Պապ թագավորի հողային ռեֆորմի ղխավոր իմաստը: Արշակ II-ի կողմից Կամսարականներից բռնագրաված կալվածները՝ Շիրակի և Արշարունյաց գավառները, Պապը վերա-

<sup>22</sup> Խ ո Ր Ե Ն Ա Պ, էջ 308:

դարձնում է այդ տոհմի ժառանգ Սպանդարատին, բայց ոչ այն բանի համար, որ այդ կալվածների բռնազրավումը եղել է անօրինական, այլ որպես պարզեկական այն ծառայությունների դիմաց, որ Ապստոլոսը մատուցել էր արմինքին: Սա արդեն նոր բան է, նոր հարաբերություն, որ ծագեց Պապի թագավորության ժամանակ: Իհարկե, մինչ այդ էլ հայոց թագավորները այս կամ այն առիթով նախարարներին պարգևում էին զյուղեր, ազարակներ և այլ կարգի կալվածներ, բայց դրանք նվիրատվություններ էին բառիս բուն իմաստով, այսինքն՝ անհատույց պործարքներ էին: Բացի դրանից, նվիրաբերված զյուղը, ազարակը և այլն դառնում էին ստացողի սեփականությունը: Իսկ այստեղ խոսքը գնում է պայմանական հողատիրության մասին: Այդ կարգի պարգև ստացողը պարտավոր էր հատուցել իր ծառայությամբ:

Պարգևականը, որի մասին այստեղ խոսվում է, դեռևս ֆեոդալական սեփականության ձևը չէ, այլ նրա սաղմն է: Նրա շնորհման ժամանակ արքունիքի և պարգևառուի միջև կնքվում էր հատուկ համաձայնություն (դաշինք, ուխտ), որը վավերացվում էր երկու կողմերի հավատարմության երգումով:

Խորենացին պատմում է, որ երբ Սասանյանները և Բյուզանդիան համաձայնության են գալիս ու Հայաստանը բաժանում երկու մասի (387)<sup>23</sup>, հայ նախարարներից շատերը թողնում են իրենց կալվածները ու անցնում բյուզանդական մասը: Պարսկական թագավոր Շապուհը, իմանալով այդ բանը, հատուկ նամակով դիմում է գնացած նախարարներին և առաջարկում նրանց վերադառնալ և տիրանալ իրենց կալվածներին: «Իսկ այնք որք ոչ լուիցեն հրամանաց մերոց, գտունս նոցա հանդերձ գիւղօք և դաստակերտօք հրամայեցանք ունել յարբունիս»<sup>24</sup>:

Նախարարներից ոմանք Շապուհի հրամանի համաձայն վերադառնում ու տեր են դառնում իրենց կալվածներին, իսկ նրանք, ովքեր մնացին Հայաստանի բյուզանդական մասում՝ «զծառանգութիւնս նոցա կալաւ Խոսրով յարբունիս հրամանաւ Գապիոյ, և ոչ երող զկալուածս որդւոյ ի հայր, և ոչ եղբօր յեղբայր»<sup>25</sup>:

Հետագայում, երբ գնացած նախարարները համոզվում են, որ բյուզանդական կայսրությունը նպատակ չունի իր մասում վերականգնել Արշակունիների թագը, ինչպես այդ ժամանակավորապես տեղի ունեցավ պարսկական մասում, դիմում են Խոսրով թագավորին և հայտնում, որ իրենք պատրաստ են ծառայելու նրան «երե հաստատեսցես առ մեզ դաշամբք գերիսս զայսսիկ: Առաջին շիշել զյանցանս մեր, զոր պատերազմեցաք ընդ քեզ ի հարկէ և ոչ ի կամաց: Երկրորդ, զի դարձուցես ի մեզ դամենայն ժառանգութիւնս մեր՝ որ ի մասինդ Պարսից, զոր հատէք յարքունիս: Երրորդ, հնարել թափել զմեզ ի կայսերէ, զի մի վրդովեսցեն զբնակութիւնս մեր, որք ունիմք իշխանութիւն յայսմ բաժնին: Եւ զայս պայման ուխտի գրել և խաչ հաստատել կնեցես և զորս տեսեալ՝ փութասցուք ի ծառայութիւն մեր»<sup>26</sup>:

23 Պապի թագավորությունը շատ կարճ եղավ: Նրա ներքին ու արտաքին քաղաքականությունը դուր չեկավ Բյուզանդական կայսրությանը: Վաղես կայսրը Հայաստանում գտնվող հռոմեական դուրքի հրամանատար Տրայանոսին պատվիրեց սպանել Պապին: Տրայանոսը Պապին կանչում է իր մոտ հյուր և նենգարար սպանում (374):

24 Խորենացի, էջ 316:

25 Նույն տեղում:

26 Նույն տեղում, էջ 323-324:



Խոսքով թագավորը ընդունում է նախարարների այդ պայմանները: Նա գրում է նախարարներին, որ համաձայն է «դարձուցանել ի ձեզ զժառանգութիւնս ձեր, զոր ունիմք յարքունիս, բայց ի յայնմանէ՝ զոր ումեմ ումեմ պարգեցեցաք, և ոչ շրջին պարգևք քաղաւորաց առանց վնասու, մանավանդ զի ի դիւանն հօրն մերոյ տեսան ծաւոյն աւրախից արախի եմուտ. այլ փոխանակ ընդ այլն և յարմունուտ լնումք և զձերուն պակասութիւնն»<sup>27</sup>:

Խորհնացու ալի վկայութիւնները, ինչպես տեսնում ենք, բացահայտում են պարգեականի կարեւորագույն հատկանիշները: Պարգեականը (շնորհակալւոր, բենեֆիցիար) աւելանական կալված է, այն շնորհվում է արքունիքին մատուցած ծառայութիւնների համար<sup>28</sup>: Պարգեականի շնորհման ժամանակ արքունիքի և պարգեականը ստացողի միջև կնքվում է ուխտ (դաշինք, համաձայնութիւն), որի ուժով արքունիքը պարտավորվում է պարգեաւորի նկատմամբ տիրապետութիւն և խնամակալութիւն, իսկ պարգեաւորն արքունիքի նկատմամբ՝ արդարամտութիւն մը ծառայութիւն ու հնազանդութիւն: «Մեր առ ձեզ տէրութիւն և խնամակալութիւն և ձեզ առ մեզ արդարամտութեամբ ծառայութիւն և հնազանդութիւն»<sup>29</sup>:

Արքունիքը կարող է պարգեաւորին շնորհագրկել ու պարգեականը ետ վերցնել, եթե նա հանցագործութիւն է կատարել. «և ոչ շրջին պարգևք թագաւորաց առանց վնասու», — ասում է Խորհնացին, այսինքն՝ թագավորական պարգեականները ետ չեն վերցվում, եթե հանցանք չեն գործել պարգեաւորները: Դաշինքը կնքելուց հետո թագավորը պարգեաւորին տալիս է մատանի, ժապավեն (զլխարկի մասը), դրոշակ և այլ իրեր, որոնք խորհրդանշում էին պարգեաւորի տիրապետութեան մեջ մտնելը<sup>30</sup>:

<sup>27</sup> Նույն տեղում, էջ 325:

<sup>28</sup> «Իսկ յազգս տէրութեանն Արծրունոյ թող վայր սր, — ասում է պարսկական թագավոր Վաղարշը ի պատասխան Վահան Մամիկոնյանի խնդրանքի, — զի զիտասցեն մարդիկն (թէ) որ ի տոհմէն, են, սպաս ինչ արժանաւորապէս ցուցանել առ մեզ և վաստակս ինչ յօղուտ Արեւաց աշխարհիս վստակել. հայնացուք ապա և մեք յարժանն» (Ղազար Փարպեցի, էջ 338):

<sup>29</sup> Ղազար Փարպեցի, էջ 100: Աղբյուրներում կան այդ ֆորմուլի մի շարք այլ տարբերակներ. «Թագաւորն վարեսցի ուղղութեամբ և նորա (նախարարները) ծառայեսցեն միամտութեամբ» (Մ. Խորհնացի, էջ 292). «Սէր առ մեզ հաստատուն պահեսցեք. և մեք առ ձեզ զմտերիմն հատուցուք ծառայութիւն» (նույն տեղում, էջ 293). «Մեր բնիկ տեսարք եք... և մեք ծառայութիւն առնեմք է հպատակ լինիմք» (Ղազար Փարպեցի, էջ 305). «Մեր բնիկ տեսարք եք, և մեք ձեր բնիկ ծառայք եմք» (նույն տեղում, էջ 372):

<sup>30</sup> Ստ. Օրբելյանը և Կադանկատվացին պատմում են, որ Հայաստանի բաժանումից հետո, Շապուհը ցանկանում էր իմանալ, թե ո՞վ և ո՞ր ազգից բարձ ու պատիվ ունի պարսկական արքունիքում: Այդ նպատակով նա կազմակերպում է մեծ ճաշկերույթ և «բաժակօք և ուտովք առաջի իւր զիրաքանչիւր ուրուր նախամեծարս ցուցանէր»: Դիմելով հայոց նախարարներին, Շապուհը ասում է. «զՊարսից և Պարթեաց յբնական պահլաւիկս և զազատագունդս զազատ արաց զԱրեւացս աշխարհի նախամեծար դասապատիւ քաջ զիտեմք զորպիսութիւն, բայց զԱրմենու զազատատոհմ և զնոցին նախապատիւ զնախադաս նախագահութիւնս ոչ կարացանք զիտել ոչ ի նախնեաց մերոց հարցն հարանց թագաւորաց և ոչ այլ ուստեք յամենաիմաստ մատենագրաց: Եւ արդ՝ մի երկուց առաջի կայ ձեզ նախարարացս հայոց ազատ արանց կատարել խնդիրս մերոց Արեւացս աշխարհաժողով ազատազարմ կուսակալաց. ցուցանել ձեզ զնախնական զգիր ըստ իւրաքանչիւրումն ըստ տանց ազատազարմն եկացն ձերոց նախաստիճան և զնախանիստ պատիւն. և դարձեալ մեծադոյն ունել զշքեղաշուք մեծարանս ևս քան զկս: Եւ եթէ ոչ կարեք ական ի յայտ Արեւացս զնդի ժողովոյ ցուցանել զգիր նախագահութեան զպատիւ և զտուն, զճող և զշուր և զստացուածս ձեր Արեւացս աշխարհի ազատ արանցս շնորհեսցուք և զձեզ ապաշնորհ և ունայնու արձակեսցուք» (Ստ. Օրբելյան, Պատմութիւն Նահանգին

Պարզեականը ոչ միայն պայմանական, այլև ցմահ տիրույթ էր։ Այն շնորհվում էր մինչև պարզեատուի կամ պարզեառուի մահը։ Եթե նրանցից մեկը մահանում էր, ապա պարզեականը անցնում էր արքունիքին։ Նախկին հարաբերությունները վերանորոգելու և վերականգնելու համար պարզեառուն, կամ նրա ժառանգը, սեպուհը պետք էր դիմեր արքունիքին։ Գահի վրա տեղի ունեցած փոփոխությանը, որպես կանոն, միշտ ուղեկցում էր հին հարաբերությունների փոփոխում կամ վերանորոգում։ «Հեղույթ արկանէր (պարսկական թագավորը) առաջի նոցա զպարզես երկրաւորս, և վերստին ամենեցուն զպատիւս և զգահսն նորոգէր, յառաջ մատուցանելով և երևելի առնելով ընդ ամենայն տիեզերական իշխանութիւնն։ Եւ անբաւ առատութեամբ ազարակս և աւանս միում նոցա յարքունուստ շնորհէր»<sup>31</sup>։

Պարսկական արքունիքում սովորություն կար, ասում է հորենացին, երբ գահ էր բարձրանում նոր թագավոր «նույն ժամայն փոխէին զդրամ գտեալ ի գանձս արքունի, զնորայն տպաւորեալ պատկեր, և գիր դիւանին՝ յայլ փոխեալ նորա անուամբ, սուղ ինչ զանազանեալ, ոչ բառնալով զհինն։ Իսկ եթէ յամիւյ է ի տերութեանն ամս բազումս, և արասցէ աշխարհագիր նոր, թողուն զայն, որ ի հնոյն փոխեցաւ, զի միայն ի նորոյն վերագրեսցի անուն»<sup>32</sup>։

Այդ կապակցությամբ հորենացին պատմում է, որ երբ սպարապետ Սահակ Բագրատունին մահանում է, Սահակ կաթողիկոսը դիմում է հայոց թագավոր Վռամշապուհին (392) և խնդրում սպարապետի պատիվը և գահը շնորհել Համազասպ Մամիկոնյանին, որը կաթողիկոսի փեսան էր։ Թագավորը չի բավարարում կաթողիկոսի խնդրանքը, պատճառաբանելով, որ նա, առանց պարսկական արքունիքի կարգադրության, չի կարող այդ բանն անել։ Այդ պատճառով Սահակ կաթողիկոսը մեկնում է պարսկական արքունիք և իր խնդրանքով դիմում Արտաշիրին՝ Շապուհի որդուն, որ հոր մահից հետո Պարսկաստանի թագավորն էր։ Սահակը խնդրում է Արտաշիրից նաև մեղմացնել Կամսարականի և Ամատունու ժառանգների վիճակը «իբր յաստուածային հրամանէ՝ ոչ բառնալ որդւոց զյանցանս հարց, մանաւանդ զի հարքն, որք մեղանն, նոքին սակս այնր և մեռան։ Որոնց մնացելոցն պարզեալ զկեալն, հրամայեաց զտունս երկաթանշիրոց զկալեալսն յարքունիս՝ դարձուցանել ի նոսա. բայց միայն ի գահ հայրենի ոչ հաստատել, այլ ի խոնարհ քան զբազումս մատուցեալ նախարարս, ի կարգ կրտսերագունից պատրաստել»<sup>33</sup>։

Սիսական, Թիֆլիս, 1911, էջ 30—31, «Մովսէսի Կաղանկատվացւոյ Պատմութիւն Աղուանից աշխարհի», Թիֆլիս, 1913, էջ 119—120։

Այն իրադարձությունը, որի մասին խոսվում է այս պատմության մեջ, ինչպես արդարացի նկատել է Ն. Աղոնցը, անշուշտ, հետագայում ենթարկվել է մշակման, ուսկայն, անկախ դրանից, արտացոլում է պատմական իրականությունը։ Կասկած չկա, որ Արշակունիների վերացումից հետո Սասանյանները պետք է որ որոշեին հայ նախարարների վիճակը։ Իսկ դրա համար անհրաժեշտ էր ինչ-որ նախնական փաստաթուղթ։ Ադաթանգեղոսի մոտ կար 17 նախարարների ցուցակը, որի համաձայն Շապուհը որոշում է հայ նախարարների տեղը պարսկական արքունիքում։ Այդ պատմության մեջ արժանի է ուշադրության բրաթակոք և ուռովք առաջի իւր ուրուք նախամեծարս ցուցանէրս (տե՛ս նաև Եղիշե, Պատմութիւն Վարդանանց, Տիֆլիս, 1904, էջ 16)։ Սրտահայտությունը, որը, ինչպես երևում է, խորհրդանշում էր կալվածի, դահի և պատվի վերաշնորհումը. բաժակով (յուղ), ոսկյա պսակ և ճյուղը հավանական է, կալվածի, գահի և պատվի շնորհման և ընդունման խորհրդանշաններն էին։

<sup>31</sup> Եղիշե, էջ 72։

<sup>32</sup> Հորենացի, էջ 330—331։

<sup>33</sup> Նույն տեղում, էջ 330։



Արտաշիրը կատարում է կաթողիկոսի խնդրանքը: Վճռաշարժիչին գրած իր նամակում Արտաշիրը կարգադրում է «վճռադասու կացուցես ի վերայ զօրացդ սպարապետ՝ մեր հրամանաւ և աղգի դորա տացես զգահ հինգերորդ պատուոյ նախարարացդ և զպեղս և զդաստակերտս, զոր տուեալ է նախնեացս իոց հարց դորա, կալցին դորա: Սապես և զտունս վնասակարաց աղգացդ, զոր էլալաք յարքունիս, թողցես ի բաց՝ աներկիւղաբար ժառանգել նոցին մնացորդաց. բայց զահուց հայրենականաց պատուոյ մի արասցես արժանի. զի և մեր ի մերում դիւանի հրամայեցաք գրել»<sup>34</sup>:

Պարզեական հողատիրությունը լայն տարածում էր ստացել եկեղեցական կալվածներում: Հայ եկեղեցին հոգևորականներին շնորհում էր կալվածներ՝ ցամաճ օգտագործման: Ըստ այն ուխտի, որ կնքվում էր եկեղեցու և հոգևւորականների միջև, այդ վերջինները պարտավոր էին պահպանել եկեղեցու և համանաձ կարգը ու կատարել այն ծառայությունները, որոնք դրված էին նրանց վրա: Եթե եկեղեցականը խախտում էր սահմանված կարգը և չէր հետևում կանոններին, ապա շնորհադուրկ էր արվում: Սահապիվանի ժողովի (444) Բ կանոնում ասված է. «Եթէ կնաւոր երէց գտցի ի պղծութեան եւ ի պոռնկութեան կամ յայլ զործս շարեաց եւ ստուգեալ վկայիք՝ քահանայութիւնն լուծցի եւ եկեղեցւոյ բաժնէ հեռացեալ լիցի 3 (300) դրամ տուգանս տալ... Եթէ երէց եւ եթէ սարկաւագ կանոն այդ կացցէ. եւ նորա ի կարգ դինուութեան կացցեն եւ ի հարկս արքունի»<sup>35</sup>:

Ներսես կաթողիկոսի և եպ. Ներշապուհ Մամիկոնյանի (548—557) կանոններում նույնպես կան վկայություններ եկեղեցական շնորհականի մասին: Այսպես, օրինակ, Ե կանոնում գրված է. «Երկականայք թէ եւ գրաւարդացք իցէն եւ պաշտանեայք, ընդ դինուորս կացցեն վասն ուխտադաւնցութեանն, եւ ի պտղոյ եւ ի մտից սրբոյ եկեղեցւոյ եւ ոչ միում մասին արժանի մի լիցին... նոյնպէս եւ տգէտք մի իշխեսցեն մտից եկեղեցւոյ, զի անիրաւ է. վասն անուսումնութեան ընդ դինուորս կացցեն եւ զհայրենի հող եւ զջուր կալցին եւ յարքունիս հարկ տացեն»<sup>36</sup>:

7. Չի կարելի, իհարկե, գործը պատկերացնել այնպես, որ պարզեականի հաստատումով իսկույն եւթ անհետացան հողային սեփականության նախկին ձևերը: Բնավ ոչ: Պարզեական կալվածների կողքին շարունակում էր գոյություն ունենալ հողի մասնավոր սեփականություն: Նախարարներից շատ շատերը, բացի պարզեականից, ունեին կալվածներ, որոնք հանդիսանում էին նրանց մասնավոր սեփականությունը: Այդ կարգի կալվածները կարող էին լինել ազատ առուծախի առարկա: Նույնիսկ շինականները մասնավոր սեփականության իրավունքով ունեին հող և ջուր: Այդ բանը շատ պարզ երևում է Շահապիվանի, Ներսես կաթողիկոսի ու Ներշապուհ Մամիկոնյանի և Դավիթի հինգերորդ ժողովի կանոններից: Այդ կարգի կալվածները, ի տարբերություն պարզեական կալվածների, աղբյուրների մեջ անվանվում են հայրենիք:

Այդ տեսակետից պատահական չէ նշելի վկայությունը. «Եւ եթէ ինչք ուրորք յաւիշտակեալ իցեն, դարձցին անդրեն: Այսպես և երկիրք, եթէ հայրեն-

34 Նույն տեղում, էջ 332:

35 «Կանոնագիրք հայոց», էջ 430—431:

36 Նույն տեղում, էջ 460:

նիք, եթէ պարզեականը և եթէ քսակադինը, և հանեալ ուրուք իցէ, հրամայ՝  
պարզի դարձիցին»<sup>37</sup>:

Արիշ կերպ չէր կարող լինել. հասարակությունը անցում էր կատարում  
ստրկատիրական կարգերից դեպի ֆեոդալականը: Այդ պատճառով նրա էկոնո-  
միկական բաղկացած էր ինչպես գալիք, այնպես էլ մեռնող հասարակություննե-  
րի տարրերից:

Ն. Ադունցը և մի շարք այլ պատմաբաններ գտնում են, որ հայկական  
«հայրենիք» բառը իր իմաստով համընկնում է Մերովինգների ժամանակա-  
շրջանի ալլոդին: Ինչպես հայրենիքը, այնպես էլ ալլոդը համարվում էր լիա-  
կատար մասնավոր սեփականություն<sup>38</sup>: Դրա հետ, իհարկե, չի կարելի չհամա-  
ձայնվել: Վերը շարադրած նյութը հաստատում է այդ եզրակացության ճշմա-  
րիտ լինելը: Դրա հետ միասին պետք է ասել, որ հայրենիքը (ինչպես և ալլո-  
դը) ֆեոդալական սեփականության ձև չէր, ինչպես ոմանք ենթադրում են:  
Ֆեոդալական սեփականությունն ունեցել է միայն մի ձև, դա ֆեոդն էր, պար-  
զեականը ֆեոդի նախնական, սաղմնային վիճակն էր, որ առաջ եկավ ստրկ-  
ատիրական հասարակության ընդերքում: Ինչ վերաբերում է հայրենիքին, ա-  
պա այն իր իմաստով ու բովանդակությամբ չէր համընկնում ֆեոդին: Ծիշտ է,  
պատմական այս շրջանում, աղբյուրների տվյալների համաձայն, հայրենիքը  
նույնպես համարվում էր ժառանգություն, բայց չնայած դրան, նա իր բովան-  
դակությամբ ու էությամբ տարբերվում էր ֆեոդից: Հայրենիքի տերը, ինչպես  
նկատեցինք, ազատ կերպով կարող էր տնօրինել իր կալվածը, նա ուներ կալ-  
վածի նկատմամբ բացարձակ, այսինքն՝ լիակատար սեփականատիրական ի-  
րավունք. ֆեոդալի իրավունքները, ընդհակառակը, սահմանափակ էին<sup>39</sup>: Նա  
իրավունք չուներ, օրինակ, առանց որդիների, աղջիկների, նույնիսկ եղբայր-  
ների համաձայնության, կալվածը վաճառել, նվիրել կամ գրավ դնել: Նույնիսկ  
այն դեպքում, երբ բոլորի համաձայնությամբ ու կամքով կալվածը (կամ ալ  
անշարժ գույք) վաճառվում էր, կալվածատիրոջ ազգականները իրավունք ու-  
նեին սահմանված ժամկետում ետ գնելու այն<sup>40</sup>:

Բացի դրանից, ֆեոդալական հողային սեփականությունը ուներ դասային  
բնույթ. հողը պատկանում էր ամբողջ ֆեոդալական դասակարգին. նրան ներ-  
հատուկ էր հիերարխիական կառուցվածք: Հողի տիրապետումը սերտորեն գու-  
ղակցվում էր զինվորական ծառայության հետ: IV—V դարերի հայրենիքը այդ-  
պիսի հատկանիշներ չուներ: Այն հանդիսանում էր իր տիրոջ լիակատար սե-  
փականությունը, այդ պատճառով չի կարելի հայրենիքը համարել ֆեոդալա-

37 Եղիշե, էջ 123: Տե՛ս նաև էջ 190, 151:

38 Н. Адоиц, Армения в эпоху Юстиниана, С. Петербург, 1908, էջ 458:

39 «Վաճառք ամենայն հաստատին, — ասված է Մխիթար Գոշի Դատաստանագրքի 107 հոդ-  
վածում, — յորժամ որք վաճառեն՝ ամենեցուն յանձնառութեամբ եւ վկայութեամբ կամքն ընդ  
նոսա իցէ: Ըստ այսմ — թէ հայր վաճառիցէ պարտ է որդւոց եւ դստերաց կամքն ընդ նմա լինել  
եւ եղբարց, որք ժառանգիցեն: Նմանապես՝ թէ որդին վաճառէ — հօրն եւ եղբարցն եւ բերցն: Ապա  
թէ ոչ — յորժամ կամին անդրէն դարձուցանել՝ իշխան լիցին թէ եւ գրով հաստատեալ իցէ» (տե՛ս  
«Մխիթարայ Գոշի Դատաստանագրքը հայոց», Վաղարշապատ, 1880, էջ 416):

40 «Եթէ վասն աղքատութեան ի կուլուածոյ վաճառէ, եղիցին փրկանօք յազգատոհմէ իւրմէ  
մինչեւ յեւթն ամ ըստ օրինացն: Զեւթն ամն եղար, բայց առաւելու որքան կարէ — արժանի է  
իսկ եթէ ոչ կարիցէ փրկել յեւթն ամն անտի յառաջ, հաստատիցի վաճառն: Ապա թէ ըստ այլոյ  
պատճառի վաճառն իցէ ի նմին ամի հաստատիցի» (նույն տեղում, 363):



կան սեփականություն ձև: IV—V դդ. հայրենիքը կականորեն տարբերվում էր միջնադարյան Հայաստանի հայրենիքից:

8. Ինչպես արդեն նկատեցինք, պարզեցական ֆեոդալական սեփականության սկզբնական, սաղմնային ձևն էր Սա դեո ֆեոդ (խոստակ, ձեռական) շէր, բայց իր ծագման օրից հակում ուներ այդպիսին դառնալու:

Աղբյուրներում եղած տվյալների վերլուծությունը ցույց է տալիս, որ պարզեցական մահից հետո պարզեցականը, որպես կանոն, նորից շնորհվում էր նրա ժառանգին: Նույնիսկ այն դեպքում, երբ պարզեցական այս կամ այն հանցանքի համար շնորհազրկվում էր, բռնագրավված կալվածները արքունիքը նորից շնորհում էր նրա որդուն: Այդ տեսակետից ուշագրավ է Կամսարականների տոհմի օրինակը: Ինչպես տեսանք, այդ տոհմի կալվածները բռնագրավել էր Արշակ II-ը: Պապ թագավորը բռնագրավված կալվածները վերադարձնում է Կամսարականների տոհմի ժառանգ Սպանդարատին որպես պարզեցական այն ժառանգությունների համար, որ նա մատուցել էր Արշակունիների արքունիքին: Նույն շարատի որդի Դավալունը շնորհազրկվեց պարսկական թագավոր Շապուհի կողմից, քանի որ նա մի շարք այլ նախարարների հետ միասին անցել էր Հայաստանի բյուզանդական կայսրության բաժինը: Հետագայում հայոց խոսրով IV թագավորը բռնագրավված կալվածները վերադարձնում է Գաղավունին, երբ, ինչպես ասվեց վերևում, նա վերադարձավ Բյուզանդիայից: IV դարի 80-ական թթ. վերջերին Գաղավունը և իշխան Ամատունին իրենց ջոկատներով հարձակում են գործում պարսկական թագաժառանգ Արտաշիրի քարավանի վրա՝ նույնպես ունենալով աղատել հայոց խոսրով թագավորին, որ Շապուհի կարգադրությամբ կալանավորվել և տարվում էր Պարսկաստան: Հարձակումը անհաջող եղավ, Գաղավունը և իշխան Ամատունին ընկալմարտում, իսկ նրանց կալվածները բռնագրավվեցին պարսկական արքունիքի կողմից: Շապուհի մահից հետո նրա հաջորդ Արտաշիրը, Սահակ կաթողիկոսի խնդրանքով, Կամսարականների կալվածները վերադարձնում է Գաղավունի որդի Հրահատին: V դարի 80-ական թթ. մարզպան Վահան Մամիկոնյանի խնդրանքով պարսկական արքունիքը Կամսարականների ժառանգին է վերադարձնում բռնագրավված կալվածները և այլն:

Այսպես ուրեմն, ավելի քան հարյուր հիսուն տարիների ընթացքում Կամսարականների կալվածները բազմիցս բռնագրավվում են Արշակունիների և Սասանյանների կողմից, բայց, որպես կանոն, նորից շնորհվում այդ տոհմի ժառանգներին, իսկ հետագայում դառնում են նրանց ժառանգությունը: Կասկած չկա, որ նույն բանը տեղի է ունեցել նախարարական մյուս տոհմերի հետ:

Դժբախտաբար աղբյուրներում եղած տվյալները հնարավորություն չեն տալիս մեզ քայլ առ քայլ հետևելու պարզեցականի զարգացման ընթացքին և ցույց տալու, թե երբ և ինչպես այն փոխարկվեց ֆեոդի (խոստակի, ժառանգության): Որոշ տվյալներ կան եկեղեցական պարզեցականի (շնորհականի) մասին: Այդ տեսակետից ուշագրավ են Դվինի հինգերորդ ժողովի (645) կանոնները: Եթե եկեղեցու ժառանգավորներից որեւէ մեկը (տղամարդ թե կին), ասված է այդ ժողովի է՝ կանոնում, անորդի լինի, այսինքն՝ չունենա որդի կամ թոռ, ապա «ի կենդանութեան իւրում իշխան լիցի ինքն ունել զամենայն անցեալ ըստ ինքն ի մերձաւորացն մի իշխեսցէ հեռացուցանել զհող և զջուր և զամենայն շնորհս եկեղեցւոյն»: Եկեղեցականը իրավունք ունի իր մերձավորներից որեւէ մեկին որդեգրել և շնորհականը թողնել նրան, «իսկ եթէ որդե-

գրեալն արժանասցի քահանայութեան՝ գեղչն վկայությամբ, կամ որ որդե-  
ղրեացն զնա եւ շէր անկ նմա քահանայութիւն սակայն, զկէս շնորհին կալցէ  
յաղագս ձեռնադրութեան ազատէ ի հարկէ և ի բեկարէ: Եւ զկես շնորհին եւ  
Կհող եւ զշուր բովանդակ սրբոյ եկեղեցւոյ թողցէ վախճանեալ քահանայն եւ  
կին նորա. ամենայն իսկ շնորհն մերձաւորացն եղցի... զի չվայել է Սրբոյ ե-  
կեղեցւոյ ղժառանգութիւն յարժանաւոր մերձաւորացն օտարացուցանել և տալ  
հեռաւոր օտարաց: Իայց եթէ անկաւորացն կամաւորութեամբ վաճառել իսկ,  
թողուցուցէ վարդապետն, զայն մի շինականի ումեք, այլ յուխտէ եկեղեցւոյն  
թէ եւ հեռաւոր եւս իցէ. իշխանէ վարդապետն եւ մերձաւորն չմերձաւորացնել...  
և այս սահմանադրութիւն եկեղեցւոյ ի Հերակղէ Հռովմայ թագաւորէ, և ի Խոս-  
րովայ Պարսից արքայէ աւուրցն և այսր եղիցի. իսկ ինչ որ յառաջ քան զնոցա  
ժամանակն գործեցեալ է, մի շարժեցի. չգիտեմք ինչ հաստատուն՝ թէ որպէս  
կալեալ սահմանանցար յանուն տեառն, և մի որ իշխեսցէ փոխել զայս սահ-  
մանադրութիւն»<sup>41</sup>:

Այսպիսով Դվինի հինգերորդ ժողովը վավերացնում է շնորհական կալ-  
վածների փոխարկումը ժառանգականի (ֆեոդի): Քահանայի կամ եկեղեցու այլ  
ժառանգի մահից հետո կալվածը անցնում է նրա ժառանգին՝ որդուն կամ թո-  
ռին, իսկ դրանց բացակայության դեպքում՝ արժանավոր մերձավորին:

Նույն ժողովի Զ կանոնում ավելի պարզ է արտահայտված.

«Ումանք յուխտէ եկեղեցւոյ, զկարգ եւ զպաշտոն թողին ու զինուորութիւն  
ստացան: Արդ, եթէ դառնան ի շար ձանապարհէն՝ օրհնեալ են ի տեառնէ և  
ընկենալ ի մէջ. ապա եթէ ոչ, իշխանութիւնն լիցի վարդապետին զշնորհս եկե-  
ղեցւոյ հանել յայսպիսացն և արժանավոր քահանայից և պաշտօնէից մերձա-  
ւորաց տալ...»<sup>42</sup>:

Ուշագրավ է այն, որ հայ եկեղեցու հայրերը նշում են, որ պարզեականի  
փոխակերպումը ժառանգականի (ֆեոդի) սահմանվել է բյուզանդական կայսր  
Հերակլի (610—641) և պարսից Խոսրով արքայի (591—628) թագավորության  
ժամանակ ու առաջարկում է եկեղեցական իշխանություններին՝ հողային վե-  
ճերը քննելիս ղեկավարվել վերոհիշյալ կանոնով: Ուրեմն, պետք է ենթադրել,  
որ VII դարի առաջին կեսում ընդունվել է հատուկ որոշում պարզեականը ժա-  
ռանգականի (ֆեոդի) փոխակերպելու մասին, որը մեզ չի հասել: Համենայն  
դեպս Դվինի եկեղեցական ժողովը օրինականացնում է եկեղեցական պար-  
զեական կալվածների փոխակերպումը ժառանգականի (ֆեոդի): Կասկած չկա,  
որ նույն պրոցեսը տեղի է ունեցել աշխարհական հողատերերի կալվածնե-  
րում: Եկեղեցին միշտ հետևել է պետական իշխանությունից բխող մղումին:

Այսպես ուրեմն, աղբյուրների մանրազնին քննությունից որոշակի կեր-  
պով պարզվում է, որ Պապ թագավորի բարեփոխությունների հետևանքով Հա-  
յաստանում ծագեց պարզեականը, որ ֆեոդալական հողային սեփականու-  
թյան նախնական, սաղմնային ձևն էր, իսկ Դվինի եկեղեցական հինգերորդ  
ժողովը օրինականացրեց պարզեականի կամ շնորհականի փոխակերպումը  
ֆեոդալականի (խոստակի, ձեռականի կամ ժառանգականի): Շուրջ երեք հար-  
յուր տարիների ընթացքում, այսինքն՝ մեր թվականության IV դարի երկրորդ  
կեսից մինչև VII դարի առաջին կեսը, Հայաստանում (ինչպես և Պարսկաստա-

41 Տե՛ս «Կանոնագիրք հայոց», հրատ. Ա. Ղլտճյանի, Թիֆլիս, 1913, էջ 125:

42 Տե՛ս նույն տեղում, էջ 123:



նում ու Բյուզանդիայում<sup>43</sup>) տեղի է ունեցել ֆեոդալական հողային սեփականության, հետևաբար, ֆեոդալական արտադրական կի ձևավորումը: Ուրիշ կերպ ասած, մինչև արաբական արշավանքների սկիզբը ֆեոդալական հասարակության լինելության պրոցեսը Հայաստանում արդեն ավարտվել էր: Պատմական այդ նույն ժամանակաշրջանում Հայաստանի տերիտորիայի վրա ձևավորվեցին մի շարք առանձին ֆեոդալական իշխանություններ, սկսվեց ֆեոդալական մասնատվածության շրջանը: Մեր պատմիչները Հայաստանի պատմության փոխարեն իրենց աշխատություններում սկսեցին շարադրել առանձին իշխանությունների պատմությունը:

#### К ВОПРОСУ О ВОЗНИКНОВЕНИИ И УСТАНОВЛЕНИИ ФЕОДАЛЬНОЙ ЗЕМЕЛЬНОЙ СОБСТВЕННОСТИ В АРМЕНИИ

А. М. ДАНИЕЛЯН

(Р е з ю м е)

Исследование экономических отношений феодального общества предполагает выяснение вопроса о возникновении и установлении крупной феодальной земельной собственности.

На основе анализа данных первоисточников автор показывает, что «паргевакан» (пожалование, бенефиций, как условное и пожизненное владение) возник в Армении в результате земельной реформы царя Папа (369) и представлял собой зародышевую форму феодальной собственности. В течение V—VI вв. «паргевакан» получил широкое распространение во владениях крупных светских и церковных землевладельцев, превратившись в первой половине VII в. в наследственную феодальную собственность, что и было санкционировано Двинским собором (645). Автор приходит к заключению, что процесс преобразования рабовладельческой частной собственности в феодальную, начавшийся еще в IV в., завершается в VII в., сопровождаясь формированием на территории Армении отдельных феодальных княжеств.

43 Ն. Աղոնցը Հուստինիանոսի անունով կոչում է «Այն ժամանակաշրջոցը, որ սահմանադրվել է խոմեական և բյուզանդական պատմության դարաշրջանների միջև: Դա անցման շրջան էր անտիկ պետականությունից դեպի միջնադարյանը» (Տե՛ս Н. Алонц, Армения в эпоху Юстиниана, էջ VІІ):

Իսկ ինչ վերաբերում է Հայաստանին, ապա այն, Ն. Աղոնցի ասելով, կազմում էր Բյուզանդիայի մի մասը (նույն տեղը, էջ X): Հետևաբար, նրա կողմից նշված պատմական դարաշրջանը Հայաստանի համար նույնպես անցման շրջան էր, հին ստրկատիրական հասարակարգից դեպի միջնադարը: Ի դեպ, Ն. Աղոնցը բազմիցս նշում է, որ հորենացու «Հայոց պատմությունը» նշանավորում է «անկման ժամանակաշրջան, երբ նախարարական կյանքի առաջվա հիմքերը խախտվել էին, պատմական կարգերը քայքայվելով անցնում էին հիշողությունների և ավանդությունների քնազավառը» (նույն տեղը, էջ 237):